

03 JUN 2001

Syed Hamid-Lawatan

SYED HAMID TIBA DI BEIJING

Oleh: R.Ravichandran

BEIJING, 3 Jun (Bernama) -- Menteri Luar Datuk Seri Syed Hamid Albar singgah di sini, hari ini dalam perjalanan ke Korea Utara untuk lawatan rasmi empat hari ke negara itu.

Ketibaan beliau disambut oleh Yang Yan Yi yang merupakan Timbalan Ketua Pengarah Jabatan Hal Ehwal Asia di Kementerian Luar China serta Duta Malaysia ke China Datuk Abdul Majid Ahmad Khan.

Syed Hamid dijadual menerima kunjungan hormat Naib Menteri Hal Ehwal Luar Wang Yi di sebuah hotel di sini pagi esok.

Menteri itu dijangka tiba di Lapangan Terbang Antarabangsa Pyongyang pada lebih kurang 12 tengah hari (11 pagi waktu Malaysia) esok.

Program Syed Hamid akan bermula dengan majlis meletakkan kalungan bunga di arca gangsa Kim Il-Sung, pengasas Korea Utara yang meninggal dunia pada Julai 1994.

Syed Hamid akan mengunjungi rakan sejawatannya di Korea Utara Pack Nam Sun pada petang esok.

Syed Hamid diiringi oleh para pegawai kanan Wisma Putra dan juga Persekutuan Antarabangsa Keibubapan Terancang dan Majlis Penggalakkan Minyak Sawit Malaysia.

Semasa berada di Pyongyang, Syed Hamid dijangka menghantar mesej persahabatan daripada Perdana Menteri Datuk Seri Dr Mahathir Mohamad kepada pemimpin Korea Utara Kim Jong Il.

-- BERNAMA

RV AKT PR